

Non ahuuacaimain huatiroquin ishon. Niaifofoan ichanancashon mato cunushonifo.

[Preamble]

Manifoti ato niaifofoan ichanancashon ischahuanifo: -Nantifin yoran isharanonfo isharatiroquin. Tsoancai mato chaca huatatiroma. Non yoia cuscan nan manifoti ato tapimahuu. Cunuti pushu muranshorifin ato tapimahuu.

Tsoan mato paranonmafin non mato yosin sharaicai.

Ahuua tsacatama rarama shara ninonfo ishon. Yora futsan ato chaca huanonma non rutunamitsaimisi inonma. Ascahuashu non isharatiro. Non isharacun copiquirifin niaifofoan noco sharahuatirofoquin.

Ascanrifin ratoranfoan yora chacahuapai ato onufain ato paranfain chacahuaifoan. Nantifinfain shinantaqui shinanfo, -Ascahuacai sharamaquin. Nantifin yoran manifoanati ahua shara yoipaiqui yoitirofoquin. icoinranhuapaiqui icoinranhuatiofoquin. Ascanhuacun futsan ato ratutiroma. Nan ahuuara yopaqui fipaiaiton, -Ma. Un mia inantiroma. Unuun oinmatifosi ato inantiro. Mato inantiromaran, ato huashon. Ascanhuatirofoma. Nan yopaifotifin ayarin inonfo.

Niaifofoan noco yoiaiton, -Manfin nan non mato yoia füstisi nan fustisi man yoitiro. Nan fustisi icoinranhuatiro, -noco huacun. Noco ratupaifafainquin. Nan non yopai cuscancai noco humatiroma. Noco niaifofoan anori acaifoanhuuncai non ato icoinran non huatiromaquin.

Mani futsanfoya shara huatanannonfo ishon nunori non yoinon.

Nan manifoti ato niaifofoan ichanancashon ischahuanifo: -Nantifin yora isharatirofo. Nocofunufu yafin ainfoforifin isharafoan niaifofoan ato cushu sharatiro. Non atonfin imapai sharaquin. Ascancuncai yononmitsamisifo itiromaquin.

Ascan manifotifoan ato niaifofoan ichanancashon nunori yoinifo, -Non nantifin yorafo yoipai isharanonfo ishon. Yononmitsamisifo inonfoma.

Ascan non yoia cuscan manifoti non tapimapai.

Articulos

Ascancunfin nonfin manifotifin anoashu ichanancashon nantifin yorafo manifoti ano yoipai isharanonfo. Non yoia cuscan shinanshu inonfo. Ascanrifiantan ato tapimannonfo. Ascanshon nantifin yoran ischahuanonfo, -Aicho man ichananfo noco yoini cuscan asharanonfo. Noco yoini cuscan non anon. Niaifofoan nantifin ato caifo anorin yoitiroran, ishon huafo.

1.

Nantifin naanno rasisin cainnifoquin. Tsoan mato ischahuatiroma cuscan, -Manfin uhuunnacoquin. Ahuua tsacatama rarama shara ninonfo ishon. Nantiffain aton mapo shinantirofoquin. Ato nomuranrin chaca iyamarain sharamainqui icashon. Ascanrifiantan nantifin manifoti yorahuan tanannon icashu.

2.

Nantifin yorafoti nocofunufu yafin ainfofo ahuuomafo non ahua ichapayafo nanscarifin asho icoinranhaunonfoquin.

Nan non cunua cuscanhuafain cunoshonon.

3.

Nantifinfin isharatirofoquin. Ahuua tsacatama rarama shara ninonfo ishon. Tsoqui musutama nitirofoquin.

4.

Tsoancai yora futsa curushcai achitiroma ahuan yonomamitsamisi inon. Ascanrifin atacai yora futsan huaricai futsa inantiromaquin yonomamitsamisi inon.

5.

Ratoran futsancai yoraqui parannatiroma.

6.

Ranushumua nantifinfain yoi inifoantirofo.

7.

Nantifinfainfin naano rasin ranushumua nicaifaintiroquin. Cushu sharafaintiroquin. Naanori non yoia. Tsoanmain ahua yoipaicai ishon ranushumato ato cushu sharacoian.

8.

Futsa futsan chacahuaiton oinquin niaifo patashariton ato cushu sharatiroquin.

9.

Tsoan chacahuacuma ranushumu ato achiyamafain cunu muran iquimaiyamafain ahuun mai arishon nichitiroma.

10.

Niaifofo yoran oincasmaifoancai ahuun niaifo patashari itirofoma. Yoran futsan yoiti huashucaí niaifo patashari itirofomafinquin.

11.

Yoran futsan yoiti huashucaí niaifo patashari tapiatamano, -Mifin min icashu, yoitiroma. Yocaqui tauhuashon.

Yora futsaforinfin yocatiro. Ascan tapisharashonfin, -Mifin min icaran, huatiróquin.

12.

Niaifofoan yoia cuscan yonoyamaiton, -Min chaca huaran, ishon ranushumuafó yoitirofoma. Tsoan ahuun pushu muran iquimacasmainocai iquitiroma. Ahuun yorarincai fucash huatiroma. Futsan cunu fumacurifincai futsan oinnantiroma. Futsacai tsain futsan huatiromafiquin. Yora futsan nanori huaitofin ranushumuaton noco cushu sharatiroquin.

13.

Nan mai futsan ano ipaiyaiñin iqui catiroquin.

Tsoan ahuun caifo ariashu caifo futsari ato mai ano capai catiro. Cafishu afanan naso curantiro.

14.

Rato futsan nan ahuun caifo muranashon'chaca huaino omitsiscahuafono raquirá futsa shinanshu mai futsa ari catiro. Mai futsan ari cashon niaifo futsan - ¿Un mato fu ipaiyaiton mian raquiri huatiromanmun?

Ascantanrifin yora nan ahuu caifoan chaca huafaino ranushumu aton achianocai raqui afanan catiroma. Mai futsa aricai catiroma.

15.

Ratoran futsan, -Unfin uhuun caifoan ahuun yoranfin unquin, -huatiroquin.

Caifo futsan muran ipaiyaitoncai tsoan nituhuantiriroma.

16.

Nocofunufó yafin ainfofo fianantirofoquin. Caifotifin ascatirofo. Fianancashon facu atirofo.

Ainfoan nocofunu ficasmaiton nocofunun fitiroma. Copiquiriri nocofunun ainfo ficasmaiton ainfoan fitiroma.

Nan niaifofoan nan yoran ipatifo atotirin oin sharapacutiroquin.

17.

Nantifin yorafófin mai nantonnacoin itiroquin. Ascanrifiantanfin yora rafutanrifin ato mai nantonnacoin huatirofoquin.

Tsoancai tsoa futsacai, -Min mai anoashu cataonhuu. Afanan minama, noco huatiromafiquin.

18.

Nantifinñainfin ahuuara shinanpaiquin shinantirofoquin. Ahuara icoinranhuapaiainfoan icoinranhuatirofo. Ascanfiantanfin nan icoinranhuapaiainfofinchifin icoinranhuatirofo. Arusu fustichinfin icoinranhuapaquin icoinranhuatiroquin. Atirifinñain a futan icoinranhuapaicaquinfin icoinranhuatirofoquin. icoinranhuashonfin yosi tiroquin. Nan icoinranhuafotifinfin chanantirofoquin. Nanscafin atirofoquin.

19.

Nantifinñainfin ahuuara shinanpaiquin shinantirofoquin. Shinanshofin futsanfori yoitiro. Tsoancai, -Nan min shinan cuscan huafain tsoan yoiyamahuu, -ishon, Anori yonotiroma. Man shinan cuscan huafain man cunutirori yora futsanforinfinfin oinmatiroquin.

20.

Nan ichananpaiaifoti ichanantirofo. Tsofumain rafupaicai nan fu rafutiro.

Ratofumain rafucasmaicai. Tsoancai, -A fu rafuhuu, huatiromafinquin.

21.

Rato futsamain ahuun caifoan niaifo itiroquin. Nan naifo ipaiyamaiton ratoran futsan ahuun caifo futan catontirofoquin. Niaifo inon icashon.

Nanfin niaifofonaquin ascan niaifofoan ato ahuuarafin apaquin atirofoquin.

Ahuuamain huapaicanicai ishonfin niaifoan ato yonotiroquin. Fasi ranan finoin finonyotan anosi ichanancashon ratomain niaiforifin iquicain ishon catontirofo. Nan nocofunugo futan ainfofoanrifin niaifofo catontirofo.

22.

Cushunacahuun. Mato caifo yafin mato yorafo cushunan sharacahuun. Ascashufin nantifin isharatirofoquin.

23.

Nantifin yorafo yonotirofoquin. Nan nocofunun nanfincoin yonopai yonotiro. Ascanrifiantan futsa yonoshonpaiquin yonoshontiro. Yonofiantiofiashucai yonoashuma isharatiromafinquin. Yono sharacashonfin nanno rasisi fitirofoquin.

Tsoan yono sharashonfin fi sharatiroquin. Yono sharacashonfin nanno rasisi fitirofoquin.

Ratoran futsa yono sharashonfin fi sharatiroquin. Ascancunfin naanton yafin ahuun yorafo isharatirofoquin.

Nantifinfainfin ano rasisi yonopaicanifin yonotirofoquin.

24.

Nan yonoi unutafin caiyahuati sharaquin. Yonohuaitianmarinfin non tunu yafin sharaquin.

25.

Nantifin non icafin sharaquin. Nantifin yonoyacain sahuutiacain pushuyacain cayatiacain. Ascashufin non shara itiroquin. Ahuara isinpa icaiforifin yonotiromafocun non cushu sháratiroquin. Ahuinfo funuomarifin non oin sharatiroquin. Anifofo yafin yoshaforinfinfin non ato oin sharatiroquin.

Nantifin ahuafo non facufo non cushu sharacahuun.

26.

Nantifinfain cunu oianfofin sharaquin.

Tapimamisiton ahuun tapimamisifo ato tapimatiro ischahuaquin, -isharacahuu, futsa sharahuacahuu, futsaqui sinayamacahuu. Futsaforifin yorahuan tanacahuu. Ascanrifiantan rutanangepiyamacahuu.

Apan futan ahuan ato facufo ahuuara tapimapai cuscan huafainfin tapimatirofoquin.

27.

Nanscaisi ahuun caifoya fuyahuanifo.

Ahuun caifo yononi cuscan huafain yora futsarifin ismatiroquin.

28.

Non yonoa cuscan manifotifin acanashu nantifin yora isharacointirofoquin.

29.

Nantifinfain nan ica pushu anofo a futan atirofoquin.

Nantifinfain ahuuara shara huatirofoquin. Nialfofoan yonoa cuscanrifin nanrifin huatirofoquin. Nalifofoan yonoa cuscan nicacasmaiton ato iquimatiro foquin.

Non cunua cuscan tsoan yoiqi huashon, -Niaifofo yoini non ahuuara chaca huatiroquin, ishon. Aririma. Non ariri yoiama.

30.

Non tsain shara fusti cunupai. Tsoan noco tsain oinfainshoncai yora futsa huapaiaitoncai oin sharamafinquin.